

Na osnovu člana 15. Zakona o udruženjima i fondacijama („Sl. novine FBiH“, br. 45/02) i člana 40. Statuta Udruženja poslodavaca FBiH, Skupština **Grupacije poslodavaca iz djelatnosti građevinarstva** na sjednici održanoj dana 31.05.2011. godine u Sarajevu donosi:

**P R A V I L N I K  
O ORGANIZACIJI I RADU  
GRUPACIJE POSLODAVACA IZ DJELATNOSTI GRAĐEVINARSTA**

**I OPĆE ODREDBE**

**Član 1.**

Pri Udruženju poslodavaca u FBiH formira se Grupacija poslodavaca iz djelatnosti građevinarstva (u daljem tekstu: Grupacija).

Grupacija je shodno Statutu Udruženja poslodavaca u FBiH oblik dobrovoljnog udruživanja članova Udruženja poslodavaca u Federaciji BiH (u daljem tekstu: Udruženje), a čija je osnovna djelatnost proizvodnja i prodaja građevinskog materijala te izvođenje građevinskih radova, visokogradnja, niskogradnja i projektiranje.

**Član 2.**

Ovim Pravilnikom utvrđuje se svrha i djelatnost, naziv i sjedište, članstvo, organizacija, organi, način izbora tijela i odlučivanje, finansiranje, prestanak rada i druga pitanja značajna za rad Grupacije.

**Član 3.**

Grupacija sve svoje djelatnosti obavlja u okviru Udruženja.

Sjedište Grupacije je u Sjedištu Udruženja.

**Član 4.**

Ciljevi Grupacije su u okviru ciljeva Udruženja, s tim što Grupacija svoju aktivnost naročito usmjerava na:

- zaštitu prava i interesa svojih članica,

- jačanje konkurentnosti građevinskog sektora,
- legitimitet pred domaćim i međunarodnim institucijama,
- praćenje i izučavanje privrednih tokova u svojoj djelatnosti
- unaprjeđenje zajedničkog tržišnog i poslovnog nastupanja,
- razvoj građevinskog sektora u Federaciji BiH, sa posebnim naglaskom na poboljšanje, uslova poslovanja,
- razvoj i promoviranje poslovnih odnosa uz izražavanje posebnosti interesa privatnog vlasništva,
- promoviranje saradnje s drugim strukovnim organizacijama,
- uspostavljanje i razvoj saradnje sa građevinskim sektorom u inostranstvu,
- zastupanje interesa članica pred organima vlasti kao i organima Udruženja i drugim institucijama,
- uključivanje, putem zakonom dozvoljenih postupaka i razvojem saradnje s nadležnim tijelima, u postupke donošenja zakonskih i podzakonskih akata u vezi s djelatnošću, te drugih djelatnosti od interesa za svoje članove,
- utvrđivanje makroekonomske i razvojne politike u građevinskom poslovnom sektoru,
- artikuliranje strategija zajedničkih nastupa na inostranim tržištima,
- razvoj i jačanje izvoznog potencijala,
- učešće u kolektivnom pregovaranju,
- pružanje stručne pomoći članovima,
- vršenje i drugih poslova od interesa članica.

#### **Član 5.**

Grupacija može u suradnji s nadležnim državnim organima i organima Udruženja, pokretati inicijative i predlagati mjere ekonomske politike koje se tiču poslovanja njenih članica.

## **II ČLANSTVO U GRUPACIJI**

#### **Član 6.**

Članovi Grupacije su članovi Udruženja iz oblasti građevinskog sektora.

Članstvo u grupaciji je dobrovoljno.

Članovi iz stava 1. ovog člana organiziraju se u Grupaciju da bi mogli uspješno raditi i uticati na unaprjeđenje rada i poslovanja u svojim djelatnostima, na usklađivanju svojih posebnih i pojedinačnih interesa sa zajedničkim interesima članova Grupacije i Udruženja, te sa općim interesim privrede na području FBiH i jedinstvenom tržišnom i privrednom prostoru u BiH.

#### **Član 7.**

Svojstvo novog člana Grupacije stiče se učlanjenjem u Udruženje poslodavaca u FBiH a u skladu sa Statutom Udruženja.

## **Prava i dužnosti članova grupacije**

### **Član 8.**

Članovi Grupacije imaju ista prava u pogledu obaveza i odgovornosti.

Prava, obaveze i odgovornosti članova Grupacije su:

- upravljaju aktivnostima, poslovima i unapređuju organizaciju rada Grupacije,
- poduzimaju aktivnosti na promicanju i zaštiti interesa članova Grupacije,
- pokreću inicijative i utvrđuju prijedloge za donošenje mjera iz oblasti razvojne i ekonomske politike, kao i privrednog i društvenog sistema iz oblasti građevinarstva,
- razmjenjuju informacije od interesa,
- ostvaruju suradnju sa nadležnim tijelima, organizacijama i drugim institucijama u FBiH radi zaštite interesa članova,
- aktivno sudjeluju u radu Udruženja i Grupacije,
- ravnopravno učestvuju u radu organa i tijela Udruženja,
- imaju pravo da budu birani u rad tijela drugih institucija u kojima je potrebno imenovati predstavnike poslodavaca,
- pridržavaju se Statutom utvrđenih prava i obaveza članova,
- moralno i na drugi način podupiru djelatnosti i ugled Udruženja,
- poštuju dogovorene profesionalne standarde i Kodeks profesionalne etike Udruženja,
- poštuju Statut i druge akte Udruženja.

Sva prava i obaveze članova iz prethodnog stava realizuju se u koordinaciji sa Udruženjem.

## **Članarina**

### **Član 9.**

Članovi Grupacije potvrđuju svoje članstvo u Grupaciji uplatom članarine Udruženju.

Članovi Grupacije uplaćuju članarinu Udruženju na osnovu Odluke o visini članarine Udruženja.

Članarina se uplaćuje na račun Udruženja.

#### **Član 10.**

Odlukom Upravnog odbora Grupacije može se uz članarinu iz člana 9. odrediti i obaveza plaćanja posebne članarine ili priloga u cilju finansiranja posebnih djelatnosti ili aktivnosti Grupacije.

### **III ORGANIZACIJA I RAD GRUPACIJE**

#### **Član 11.**

Rad Grupacije je javan.

Organi Grupacije kroz infrastrukturu Udruženja poslodavaca FBiH (mediji, časopisi, publikacije Udruženja i dr.) izvještavaju članove i javnost o ciljevima i aktivnostima Grupacije. Po potrebi to čine i samostalno kroz dostavljanje dokumenata, zapisnika i slično.

#### **Član 12.**

Grupacija ne može svojim aktivnostima nanositi štetu ostalim udruženjima, grupacijama i njihovim članovima i dovoditi u neravnopravan položaj druge djelatnosti, odnosno grane privrede.

#### **Član 13.**

O poslovima i pitanjima iz svoje nadležnosti Grupacija donosi prijedloge i zaključke samostalno, pridržavajući se smjernica i stavova Skupštine i tijela Grupacije, nadležnih organa i tijela Udruženja i u skladu sa ustaljenim običajima poslovnog morala.

#### **Član 14.**

Grupacija može, u okviru svoje djelatnosti neposredno upućivati prijedloge nadležnim tijelima Udruženja i tijelima Asocijacije poslodavaca BiH, radi rješavanja određenih pitanja i poduzimanja odgovarajućih mjera od interesa za Grupaciju ili pojedine članove kada nisu u suprotnosti sa općim interesima članova ove Grupacije ili Udruženja u cjelini.

#### **Član 15.**

Stručna pitanja, problemi i aktivnosti iz nadležnosti Grupacije, zavisno od njihove prirode razmatraju se i rješavaju u okviru Upravnog odbora Grupacije i njenih drugih radnih tijela (komisija).

## **Organi Grupacije i način odlučivanja i upravljanja**

### **Član 16.**

Članovi Grupacije upravljaju organizacijom kroz slijedeća tijela:

- **Skupšina Grupacije**
- **Upravni odbor Grupacije**
- **Komisije**

## **Skupština**

### **Član 17.**

Skupština Grupacije je najviše tijelo upravljanja radom i poslovanjem Grupacije. Skupština Grupacije:

- donosi Pravilnik o organizaciji i radu Grupacije, njegove izmjene i dopune, te druge opće akte određene ovim Pravilnikom,
- imenuje predsjednika i potpredsjednika Skupštine,
- imenuje članove Upravnog odbora Grupacije,
- utvrđuje opću politiku rada i djelovanja, te donosi temeljne odrednice za program rada,
- razmatra i zauzima stajalište o izvještajima tijela Grupacije u skladu s odredbama ovoga Pravilnika,
- odlučuje o prestanku rada Grupacije,
- donosi Poslovnik o svom radu,
- bira članove Grupacije za predstavnike u Skupštini i Upravnom odboru Udruženja poslodavaca u FBiH, u skladu sa Statutom Udruženja.

Po potrebi Skupština može osnivati i imenovati odgovarajuća tijela, kad je to potrebno radi rješavanja pojedinih pitanja, u skladu s odredbama ovoga Pravilnika.

### **Član 18.**

Skupštinu Grupacije sačinjavaju svi članovi Grupacije.

Kvorum za rad Skupštine je 50% svih članica ili 20 prisutnih članova ukoliko je broj članova veći od 40.

#### **Član 19.**

Sjednicu Skupštine Grupacije saziva i predsjedava joj Predsjednik Skupštine Grupacije, a u slučaju njegove spriječenosti – potpredsjednik Skupštine, a u slučaju spriječenosti potpredsjednika predsjednik UO Grupacije.

Mandat Predsjednika i potpredsjednika Skupštine traje 4. godine.

#### **Član 20.**

Redovne sjednice Skupštine Grupacije održavaju se najmanje jednom godišnje.

U slučaju potrebe može se sazvati vanredna sjednica Skupštine. Vanredna sjednica Skupštine može se sazvati radi rješavanja posebno značajnih pitanja za rad Grupacije.

Poziv za sjednicu Skupštine Grupacije upućuje se članovima Skupštine najkasnije sedam (7) dana prije dana održavanja sjednice.

Poziv za vanrednu sjednicu upućuje se članovima Skupštine najkasnije tri (3) dana prije dana održavanja sjednice.

U pozivu za sjednicu treba naznačiti prijedlog dnevnog reda sjednice, mjesto njena održavanja i vrijeme početka rada.

Uz poziv za sjednicu Skupštine članovima se dostavljaju svi materijali pripremljeni za Skupštinu.

#### **Član 21.**

Svaki član Skupštine Grupacije ima pravo glasa.

Svaki član Skupštine Grupacije ima jedan glas.

Odsutnog člana Skupštine Grupacije može u glasanju zamijeniti drugi član Skupštine Grupacije, uz pisanu punomoć za glasanje.

Glasanje na Skupštini je javno.

#### **Član 22.**

Skupština Grupacije donosi odluke većinom glasova prisutnih članova Skupštine Grupacije.

### Član 23.

Na sjednici Skupštine Grupacije vodi se zapisnik, u koji se moraju zabilježiti doneseni zaključci, odluke i rezultati izbora.

Zapisnik sa sjednice Skupštine Grupacije potpisuje Predsjednik Grupacije, ovjerivač zapisnika i zapisničar.

Zapisnik sa sjednice Skupštine Grupacije zajedno sa zaključcima i odlukama dostavlja se svim članovima Grupacije i stručnoj službi Udruženja.

### Upravni odbor

### Član 24.

Upravni odbor je kolektivno tijelo upravljanja svakodnevnim radom i poslovanjem Grupacije.

Upravni odbor Grupacije ima slijedeće nadležnosti i ovlaštenja da:

- priprema i predlaže pravilnike i pravila iz djelokruga Grupacije,
- utvrđuje prijedloge za imenovanje predsjednika, potpredsjednika i članove Upravnog Odbora Grupacije,
- priprema i predlaže plan rada Grupacije,
- priprema i predlaže izvještaj o radu,
- priprema i predlaže nacрте dokumenata koja usvaja Upravni odbor Udruženja iz oblasti građevinarstva,
- predlaže predstavnike Grupacije u Upravni odbor, radna i druga tijela Udruženja poslodavaca, mješovite državne delegacije i komisije, projektne i ekspertne grupe,
- raspravlja i donosi zaključke i preporuke o temama koje su od interesa za članove Grupacije.
- Imenuje, savjetuje i nadzire osobe ovlaštene za kolektivno pregovaranje i sklapanje kolektivnog ugovora, te verificira rezultate pregovora,
- prenese ovlasti za sklapanje kolektivnog ugovora na Udruženje poslodavaca u FBiH,
- rješava i druga pitanja koja nisu stavljena u nadležnost drugom tijelu Grupacije.

### Član 25.

Upravni odbor Grupacije čini ukupno 9. (devet) članova:

Upravni odbor između svojih članova bira Predsjednika i Potpredsjednika UO Grupacije.

Mandat članova Upravnog odbora traje 4. godine.

Upravni odbor ostaje na dužnosti do izbora novog Upravnog odbora.

Dužnost člana Upravnog odbora je volonterska.

Prilikom predlaganja i izbora članova Upravnog odbora, treba se učiniti napor da se obezbjedi reprezentativnost članova te ravnopravna zastupljenost po regionalnoj, nacionalnoj i spolnoj strukturi.

#### **Član 26.**

Upravni odbor saziva Predsjednik Upravnog Odbora Grupacije.

Upravni odbor sastaje se u pravilu 1 mjesečno.

U pozivu za sjednice mora biti naznačeno mjesto i vrijeme održavanja, te dnevni red sjednice.

Upravni odbor može donositi pravovaljane odluke ako sjednici prisustvuje većina članova Upravnog odbora. Odluke se donose većinom glasova prisutnih članova, ako ovim Pravilnikom nije drugačije određeno.

Upravni odbor može donijeti Poslovnik o svome radu.

#### **Komisije**

#### **Član 27.**

Radi zaštite specifičnih interesa članovi Grupacije mogu osnovati podgrupacije.

Komisije se bave pitanjima od zajedničkog interesa za obavljanje, unaprjeđivanje i promoviranje neke djelatnosti unutar Grupacije, te se osnivaju radi lakšeg rješavanja određene problematike i razmjene iskustava s određenog područja.

Komisije dostavljaju prijedloge, zaključke i mišljenja drugim tijelima Grupacije, a mogu nastupati i prema vani putem za to ovlaštenih osoba Grupacije ili Udruženja.

#### **Stručna služba**

#### **Član 28.**

Stručne, administrativne, pomoćne i druge poslove Grupacije obavlja u pravilu stručna služba Udruženja.

U dogovoru sa Upravnim odborom Udruženja poslove iz stava 1. ovog člana mogu obavljati i druge osobe koje angažuju članovi UO Grupacije.



#### **IV FINANSIRANJE**

##### **Član 29.**

Finansijska sredstva potrebna za rad Grupacije i njenih tijela osiguravaju se iz članarine članica Grupacije koju plaćaju Udruženju na osnovu Odluke UO.

#### **VI PRIJELAZNE I ZAVRŠNE ODREDBE**

##### **Član 30.**

Ovaj Pravilnik mora biti u skladu sa Statutom Udruženja poslodavaca u FBiH.

Ukoliko nešto nije regulisano ovim Pravilnikom primjenjuje se Statut Udruženja poslodavaca u FBiH.

##### **Član 31.**

Ovaj Pravilnik stupa na snagu danom usvajanja.

##### **Član 32.**

Izmjene i dopune ovog Pravilnika vrše se na način utvrđen za njegovo donošenje.

**Predsjedavajući Skupštine Grupacije**

---